



Fasnetspredigt

2012

Narri Narro iazt isch's so weit
en Hirscha isch iazt Fasnetszeit
des hau au i ersch grad vernomma
wega deam be i au glei zom Hexadanz komma.
I will eich nau gschwend verzehla,
was so bassiert isch em ledschda Johr
ond des was i do sag, des isch ällas wohr.
Dr oi oder ander der wurd sich schau draus erkenna,
brauch sich aber wega deam lo lang et schemma.





Jo iazt isch Fasnet, jo des isch toll
i wois gar et reacht mit was i heit afanga soll?
Wean nemm i als erschdas uf d'Schipp
i fang glei a mit Politik.
D' Griecha, dia machad keurig Miese
mir schdeggat en dr Eurokrise.
D' Merkel ond dr Sarkozy
a Traumpaar wia en Bullerbü.
Dia miasad onsern Euro redda
se gäbbat äll's drom, do keet i wedda .
Des isch d' Politik vor grausa Welt,
s'dreht sich emmer blos om's Geld.
Bundespräsident Wulff des han i gschwora,
der konnt heit et davo o'gschora!
Uf Sylt, duat er sein Urlaub buacha,
do will er günschdig Freunde bsuacha.
Für a Häusle, do griagt er an Superkredit
0,001Effektiv narr do konsch nemme mit.
Er teschdat an Skoda, an Gelendewaga a kloiner
nadierlich au ommasuscht, des merkt jo koiner.
Bis des en dr Zeidong schdand
Leit des isch doch allerhand!!!!



Dr Markus Schneider mo isch bei de Feirige Hond
was der so onder dr Woch duat, i gäb`s eich glei kond
er fehrt Päckle ond Briaf mit ma geala Bussle durch`s Land
em Friahlang isch`s bassiert, was des isch allerhand.
Dr Markus goht zo ma Haus, er will a Päckle nabrenga,
iazt duat do em Hof denn a Hondle rommschbrennga
des bällat ganz gifdig, wia kas andersch sei
ond beißt gschwend am Markus en Hendara nei.
Zwei Wocha hot`s daurad bis dr Markus war fit
Markus s`nägschd mol nemmsch au s`Hundespray mit.

A baar Wörtle, des isch dr OB Palmer wert
wenn au en seim Kear dr Moscht et gärt.
Schbara duat er, mo nr ka,
guck i nau dia Trepp uf da Öschdrberg a.
Dia keert nagelnaidich gricht
bevor no ebber d' Fiaß abricht!!!
Bei dr Trepp uf da Schualberg aber, er s'Geld ibreg hot
dafür schbart ma halt am Hirschemer Kender Ort.
Der soll, i will iazt gar et liaga,
ed a mol an Kear griaga.
Dean Kear, den braucht ma jo so nedig
Gott sei dank sen d'Plee noid fedig!
Geit des an Abau ohne Kear,
no schick am d'Hirschemer Bürgerwehr,
dia schiast deam no, des sag i frei
Konfettisalva end d' Amtsschdub nei



Bei dr Musikprob des isch koi Scherz
do frogat doch dr Chrischdof Werz
dr Edmund Fridrich o heidanei
was des au fir a Musikstückle sei????
Dr Edmund said, des wois i edda
des schbiele mir am Konzert et, do keet i wedda!
Doch en jedra Prob des sag i au
hot dr Dirigent des Schdiggle schbiela lau.
I wois et, mo dia mit am Kopf beim Proba send
suscht heddat dia zwoi des Schdiggle doch kennt
des war bei dr Hauptprob vom Musikverei
jo do fellt oim nix mei ei.


Bei Hausmacher Veschber ond Hirschemer Wei
send dr Marc Kittel, Markus Schneider, ond a baar andere no
en Gertud`s ond Walter`s Beasa gsei.
S`war gega schbäder, se hend a Idee
se send no naus ens Hirschemer Feuerwehrmagazee.
Zom Raucha loinat se an d`Hauswand na
gwea send des jo grad vier Ma.
Am Marc hot´s an dr Wand et glangat,
der isch halt no uf d`Heck nufghangat
dia ka deam sei Gwicht nadierlich et schdütza
des duat am Mark iazt gar nix nütza
d`Heck bricht na, i sags eich doch
selt denn isch heit a riesa Loch.
Do west nix mei, oh la me gau
do muaß ma zersch mol ufforschda lau.

Dass ma Gebutsdag feirat, oimol em Johr
des konnt bei jedam oimol vor.
Beim Bernd Hartmann seinam, do war d`Schdub vol
graduliert hend d`Freind ond drengat uf`s Wohl.
Ma isch em feira middla drenn
dr Bernd der hängt em Sessel denn
er merkt wia d`Auga schwerer went
no schdoht er uf ond goht bloß gschwend
en sei Zemmer, leid nei en`s Bett
ond schau schnarchlad dr Kadett.
D`Geburtsdagsgäscht, des went ihr wissa,
dent dr Bernd ersch schbät vermissa
ond mo se noch am guggat hend
leit der em Nescht, hot längschd scho pennt.




Ois des sag i frank ond frei
Kendergärda em Flegga, des hen mir drei!!!!
Dr neie schädische, mo d`Bundeswehr hot mitfinanziert
wega deam hot ma dean nato oliv a gschmiert!!!
A Bewohner aus dr Nochbrschaft,
der hot des glei richtig grafft,
hot en dr Zeidong sich beschwert,
dia Farb dia häb jo gar koi Wert
ma keet moina bitte sehr
sei s`Krankahaus vor Bundeswehr!!!
Ond em Herbscht, do war`s soweit,
do hot ma s`Kenderhaus St. Martin eigweiht
an Beddoglotz en umbrabraun,
s`war so laut ma verschdoht sich kaum
do hot`s g`halat i sag`s eich alle
wia en ra leera Narrahalle
au d`Griaß vom Bürgermeischdr Lucke
hot koiner mitgriagt, isch jo jucke
ond für so an Bau, i schwätz koin Scheiß
griagat d`Archidekta no an Ehrapreis.

So, iazt glei no a baar Wort
vo Hirschau`s scheenschda Badeort!
Em Baggersee, o la me gau,
schdoht`s Tausendblatt bald wieder mederhau
dromm lad i iazt eich alle ei
bei dr Entkrautong wied dabei zom sei.
om`s Veschber brauchad ihr et sorga,
zor Roswith Binder sag i morga
dass se sich a bissle angagiera soll,
mit Geggale vom Grill, des wär ganz toll,
fir d`Vegis, do daz Käs ond Rädich
i hoff, dia isch iazt gar et grädich
zom Drenga Tee ond Apfelsaft
des geit zom Schaffa sehr viel Kraft
vom Metzger warma Leberkäs, dees wär eiwandfrei
do wär beim Veschbr au i dabei.



A Skyline uf am Spitzberg,
des isch am Palmer sein Traum
ob des wohl goht, i glaub des kaum.
Drei Wendräder uf am Spitzberg, so will er plana
wia des wohl aussieht, des kennat ihr ahna.
Dia send jo haier wia dr Fernsehturm
ond dreha dent se sich bloß bei Schdurm!
Dr Schdurm bei aus a Rarität
höchschdens ma hot Leisa keet.
Oi Wendrad bringt Schdrom vo 5 Milliona Kilowatt Schdond
des langat a ganz Johr für 1000 Familia mit Kend ond Hond!!!
Ois, des wurd nadierlich au no abgeschdemmt,
was für a Farb ma zom aschdreicha nemmt
brau wia d`Wengatheisle, oder weiß wia dr Kapell ihr'n Verputz
des wois blos dr Landschaftsschutz.


Äll Johr an Dreikönig, do isch as soweit
do went dia Häser vom Schdaube befreit
ma trifft sich en dr Zunftschtub, weil do macht ma aus,
wer zo weam goht ond en welchas Haus.
D`Lombakabell, dia heizt glei mol ei
ond no goht´s en da Flegga nei
zerschd ens Pfarrhaus zor Gabriele Lutz
dia isch an reachda Fasnetsbutz.



Ihr Ma duat en dr Schdub romschbrennga
duat deane Aschdauber Würstle brenga
zom Drenga geit´s nadierlich Schnaps aus am Löffel au
wia früher emmer bei Radegunde ond Reinhard Pfau.
Dr Michael Werz a ganz jonger Hond
was deam bassiert isch, des gäb i eich konnt
beim Martin Wekenmann dob, s´war 5.Haus,
do haut´s deam Michael dr Schbonda naus
er kozt am Marde en´s Esszemmer nei
Gottseidank isch´s schau a´gschdaubat gsei.
A halbe Schdond schbäder, s´war beim Ortsvorschdeher donn
do konnt beim Michael nomol an Schwong
dr Michael kozat wia keet´s andersch sei
am Ortsvorschdeher middla ens Wohnzemmer nei.

D Andrea Endreß, wer des et woiß
des isch a Enkele vom Grabagoischt
se isch mit z´Schwalldorf beim Omzug gsei
Ond do dazua fellt mir folgendes ei.....
Am offana Feuer dent d´Narra sich gwärma
vom Moser seim Hausdrunk do kam a blos schwärma
Se dreht sich am Feuer om blos gschwend
ond schau hot dr Feadarawisch am Rätschle dann brennt!!!!
Dia Feadara schdengat frogat et wie
Als wär an Sauschdall a Parfümerie
Se lauft dr Omzug trotzdeam, ihr isch as egal
So kasch aber et ge Venedig zom Karneval!!!!!!!!!!!!

Dass d'Zunft a mol wieder aktuelle Bilder hot,
des sag i brav
do hend mir bschdellt an Fotograf
en d'Kelter naus zom Fotografiera
saukalt isch gwea, alle dent friera.
Ond d'Bürgerwehr mit ihrer Kanooo
dia brengat s'Dierle et uf i sag's grad mol so.
Dr Michael said, i be doch et bsoffa
des Dierle war no nia verschlossa.
No dent vor Bürgerwehr a baar schdarke Manna
blos gschwend an d'Kano nalanga
ond lupfat se, se send et domm,
oifach über s'Dierle nomm.
Dr Fey Reiner konnt, was dennt au ihr
ond zuut mol kräfdig an dr Dier
zmol war se offa, dass i et lach
ma braucht halt zo ällam a Ma vom Fach.



Mei Fasnetspredigt dia isch iazt am End
iazt kommad dia Hexa ond danzad no gschwend
i gang en d'Narrhalla naus
do be i luschtig ond froh
I griäß eich dreifach mit
Narri ond Narro

Jürgen Faiß
16.02.2012